

· 物色篇 ·



詠象棋

棋局人生俗套辭，反躬親覩確如斯。
過河卒子無歸路，困谷將軍獨處危。
重線雙車誰可御，連環二馬孰能騎。
行田莫笑曾飛象，逾矩當知沒了期。



詠馬將

國粹原分中港台，一牌多制興乎來。
東南西北風頻轉，萬索筒番子各堆。
上碰規條宜細辨，和糊則例豈恆裁。
休言小道隨心意，問禁方能悶發財。

附記：

馬將雖云國粹，卻有中、港、台，以至各地不同玩法，規則亦各有異同；惟至今仍無強求劃一之議，堪為「一牌多制」典範。機靈者但識「問禁」而行，鑽營其中，信可「悶」聲「發」其大「財」矣。

詠街頭小吃之蒸腸粉

一剪無情斷熱腸，還添百味待君嘗。
混淆油醬籤輕撥，搬弄芝麻舌豈長。
聚攏街頭非物議，盤桓攤畔暫機忘。
可觀小道無拘泥，況帶兒時齒頰香。

詠石獅

坐鎮乾坤舍我誰，號咷天地鬼神知。
龍蟠那得千邪散，虎踞何曾萬獸隨。
望借哼哈凝意氣，還憑指爪制熊羆。
重門獨恨長株守，難越雷池效脫錐。



詠石二題

其一·詠雙獅石

不羨龍蟠虎踞姿，憑誰慧眼辨雄雌。
三生有石雙獅證，後顧前瞻亦悅怡。

其二·詠青蛙石

幾曾坐井譏天小，尚盼臨崖面野荒。
舉世莫嘲頑石固，巋然凝佇眇穹蒼。

詠面書

指觸熒屏實亦虛，真耶幻也面中書。
餐前美食先嘗遍，聚後歡顏盡展諸。
私隱願為天下告，厥詞何懼世人噓。
悼亡報喜生辰事，評讚從來任意舒。

詠爐火

爐火純青豈偶然，一薪未盡另薪傳。
方知獨木燎難久，惟仗同柴燄始延。
賸炭無光沉此際，遺材餘熱勝從前。
攏圍非為溫層暖，共冶相融盼惜緣。



日月二題

其一·落日

落日懸天線，淡然沾俗塵。
賸光餘熱在，猶照未歸人。

其二·新月

新月橫空待滿時，欲傾華廈怕尋詩。
但教夜夜澄明在，管甚盈虧亦展眉。

詠野岸橫舟

天地待吾撐，江湖任我行。
衣沾何足惜，野岸一舟橫。

詠觸角二蝸牛

觸蠻難得一枝逢，柔角相迎軟語喁。
未動干戈爭土地，惟濡涎沫辟疽癰。
盤旋管甚纏身累，顧盼寧思過露濃。
莫謂虛言君且聽，不拋重殼亦從容。



牛年詠牛

穀棘堂前淚，蒼茫關外蹄。
火攻稱怪陣，海入笑汙泥。
鐵扇依懷醉，銀河望眼迷。
悲歡離合事，庖解物同齊。

哀野豬

一族悠然隱嶺崗，只緣關土失窩藏。
追車為覓嗟來食，奪路難防卒爾槍。
天地不仁哀野豕，塵寰何律飾凶狼。
相安物我原無間，奚事誅屠辣手揚。

倉鼠（仿《詩經》體）

倉鼠有毒，人而無束。
 人而無束，不死何贖。
 倉鼠有疫，人而無澤。
 人而無澤，不死何益。
 倉鼠有疾，人而無術。
 人而無術，胡不遄卒。



看照貓成虎圖有感

豈慣臨流顧影憐，半窪渾水展新天。
 嬌柔宛轉投懷抱，肅殺森嚴鎮嶽川。
 得志未曾先得意，操持莫道盼操權。
 不須攬鏡尋花月，舍我其誰自岸然。